

KOPLA ZAHARRAK

(Nagusiari)

1'go abeslariak

Udaberrian loreak dute
landa guztia edertzen
zuaiz gañean diarduala
birigarroak kantatzen.

Etxe onetako nagusia jaunak
oyal ederrez txamarra
pitxi politez apaindua da
soñean daraman kapa.

2'go abeslariak

Orain nik ere asi nai nuke
nagusi jauna koplatzen
jaun prestu orrek barkatuko dit
ongi ezpanaiz mintzatzen.

Berarengandik itxoiten dugu
eun duroko txartela
garai onean pozkidatzeko
triste daukagun sabela.

(Etxeko andreari)

Biyotz oneko andre zabala
ama onaren alaba
goimaitasunez joaten zera zu
iñon negarrikan ba'da.

Bai ta errukiz txukatu ere
beartsuaren negarra
erri guztian ala diote
zu aingeru bat zerala.

(Sendi guztiari)

Krabelintxuak bost orri ditu
larrosatxuak amabi
etxe onetako sendi ederrak
loretegia dirudi.

(Azken agurra)

Agur ta agur, etxekotxuak
Jaunak gabon dizutela
biotzez esker onak emanaz
orain ba'goaz aurrera.

Agate Deuna jatxi dedila
gozoro zuen artera
guzti-guztiok eramateko
zeruko gozamenera.

(Ziñegotziari)

Etxe onetan bizitzen zaigu
ziñegotzi bat jatorra
emengo gazte taldeengandik
artu zorion agurra.

Gizon orreri opa diogu
osasuna ta pakea
orain bezela urte askotan
zoriontsu izatea.

(Apaiz Jaunari)

Agur etxe ontako apaiza
agur dagizut biotzez
Kristo'ren jarraitzallea zera.
Jaungoikoaren bitartez.

Ni ez baldin ba'naiz engañatzen
esango dut bereala
zerutik jetxitako santun bat
apaiz orixe bai dala.

(Lendakariari)

Jel Batzoki'ko lendakaria
etxe ontan bizitzen da
ori bezelako gizonarik
iñun billatutzen ez da.

Gora gure lendakaria
gora bai biotz-biotzez
gure biotzak poztutzen dira
zutaz gogoratu utsez.

* * *

OHARRA.- Kopla hauek Maria OLASAGASTI NIETOren etxeko argazki zaharren artean aurkitu eta zure eskura, irakurle, jarri ditut.

AGUSTINA PONTESTA GARMENDIA